

正
誼
堂
文
集

正誼堂文集卷十九

鄞 董 沛 孟如

墓志

按察使銜署兩浙鹽運使分巡金衢嚴道贈太常
寺卿世襲騎都尉諡武烈繆公墓志銘

咸豐十一年二月壬戌署兩浙鹽運使溧陽繆公殉節
於杭州

天子憫其忠

賜卹如例其年閏三月王壯愍撫浙惑於浮言以閉城
不戰爲公咎奏撤其卹典越三年浙士趙之謙伏闕訟

之

詔下疆臣覈覆於是閩浙總督左公宗棠疏直其事實
同治三年十月又五年浙撫李公瀚章請建專祠又三
年浙撫楊公昌濬請予謚並以事狀付史館咸奉

俞旨嗚呼勞臣死國日久而論始定榮哀異數賁及重
泉公可以無憾矣公諱梓字南卿世居溧陽之璧溪里
曾祖惠成祖國楹父壬諸生竝贈榮祿大夫曾祖妣董
氏祖妣呂氏妣狄氏竝贈一品夫人公奮起孤童自力
於學年十九補博士弟子道光八年舉賢書十五年大
挑一等授知縣分發浙江歷署石門仙居奉化諸劇邑

所至有聲以失察吏胥鐫秩調用檄治漁山盜檄振嘉興水災援例復官改同知咸豐二年檄署杭州同知方是時粵寇踞金陵江淮南北亢旱千里豐工潰決河運不通戶部下行省亟籌變計公以江南海運創於陶文毅成法具在可覆按也請撥浙糧歸併江蘇分載沙船衛船甯波船酌給經費由上海北行事以克集無何劉麗川陷上海海運亦阻公知太倉之劉家河明以前故運道也開濬淤沙凡數十里遂督漕艘由六渡橋出新河之口先後七十餘萬石安抵天津浙撫黃公宗漢上其功

詔晉知府四年七月補甯波未之任旋移杭州海運再竣以道員擢用上海平

賞孔雀翎尋署杭嘉湖道兼署鹽運使六年春署按察使駐軍常山扼東西浙門戶踰年補金衢嚴道八年正月僞翼王石達開大舉窺浙越廣信犯江山公分兵救之而與衢鎮饒莊勇公回防郡城甫至郡江山已陷敗卒紛紛來賊乘之直薄南門公親督數百人鏖戰城下賊卻遂約饒公誓死守分隊列營燔郭外民舍別遣援軍屯城北之浮石渡東北之樟樹潭通杭衢之道俾利糧運部署略定賊衆號八十萬西陷常山開化東陷遂

昌松陽蹂處州掠永康進逼金華彌亙二百餘里而歸
重於衢番上進攻大小數十戰掘地道者五卒不得逞
驍將楊勝先陳仕祥楊玉林皆戰死公飛書乞援江總
兵長貴自徽州至周總兵天受自甯國至江甯大營亦
遣總兵明安泰自蘇州至乍進乍退無大勝負賊圍郡
日益亟夏六月九江總兵李公定泰始率銳師五千取
道嚴州復壽昌縣耀軍於城北公命諸將楊國正瞿先
仲朱衣陳英等開城擊賊與援師相應賊大敗南竄衢
州被圍厯九十一日而始解非公善守浙之糜爛蓋不
待庚辛閒也敘功加按察使銜再署鹽運使十年春南

陵賊眾自青弋江入廣德州連陷安吉長興孝豐武康
杭州大震公請於巡撫羅壯節公急檄皖南諸援軍還
顧根本江督何桂清沮之城中無守卒倉卒召募不滿
四千垣周三十六里堞置一人猶闕紳民習於晏安驟
聞變議論蠭起未見賊則曰諜妄語耳胡閉城旣見賊
則曰賊易與耳胡守胡不戰民與兵仇且曰兵應賊紳
與官仇且曰官袒兵客兵語音殊偶睚眦市人縛而殺
之日數輩孤城岌岌陰雨積旬公與按察使段公光清
各出選鋒啟門突賊圍再戰不利夜縋死士燒賊營又
以甚雨火不能蕪公自知必死晝夜坐清波門毋敢交

曉一日天忽霽方集諸軍懸賞決鬪而地道猝發賊已
蟻傳入守兵皆潰公率親從十餘人力戰城上身被數
十創刃其脰幾斷猶不仆賊以火器轟折其右股乃仆
守備孫遇龍傭卒丁春漢從公死時二月二十七日也
公子德棻等方在衙署乘閒負公尸坎地數尺棺而埋
之越五日丙寅杭州復始具衣冠成殮如禮權厝於龍
井山麓事定

詔贈太常寺卿世襲騎都尉恩騎尉罔替

特諡武烈本貫及死事處所均建專祠公少以詩文馳
譽吳下旣長講經世之學凡練兵籌餉治河防海行鹽

轉漕諸大政抉擿其利病皆有論撰服官浙中大府倚
如左右手政無不舉然亦以才望爲媚嫉者所忌屢瀕
危險不竟其用而死死之年僅五十有四知與不知者
咸扼腕太息爲公惜也配王氏同縣人歲貢生贈通議
大夫簡女封一品夫人子六德棻二品銜江西候補道
署按察使星遘浙江候補知府前卒懿福建候補同知
銓浙江候補同知彝鹽運使銜直隸候補知府鞏光緒
五年舉人候選知府女二長適蕭山候選知縣陳光燕
次字閩縣候補鹽運司經歷葉祖泰未行卒孫九人孫
女九人光緒十年公諸子卜吉擇地大葬公於杭州城

外之積慶山以志幽之石屬沛銘之昔在里門嘗以鄰
邑士謁公於郡邸承望顏色公所期許者良厚今相去
四十年公之歿亦二十五年矣猶獲以屬城下吏埶長
嗣君統轄之列於其葬也安可無辭銘曰

謂公不用公已監司謂公用矣時乃厄之旣厄其生復
厄其死疇懇公冤公有高第官斯葬斯遺民永思公魄
在冢公魂在祠生則盡職死則盡力不涅不磨千秋片
石

盧六橋先生墓志銘

光緒丁丑余成進士將服官江西六橋盧先生已病痺

猶爲文以贈行大略謂鄉前輩黃公繩先乾隆丁丑進士也作宰西江稱循吏第一欲余踵其武無忝前哲余拜而受之閱二十日先生卒此序遂爲絕筆又十年乙酉諸子以十二月九日葬先生於寶幢廟後山之陽實來請志何忍不銘先生諱椿字大春一字子懷六橋其別號也先世自東陽遷定海明嘉靖中復遷郡城君子營遂爲鄞縣人曾祖培國子監生受業於仇滄柱陳介眉爲黃梨洲再傳弟子祖鎬平陽教諭受業於全謝山浙東西所稱月船先生者也父雲泗縣學生家世儒業得諸先正之傳而其宗人有樓曰抱經儲藏之富與范

氏天一閣埒先生未冠卽登樓讀書資稟瓌異目數行
下瀏覽所及踰數萬卷旁逮釋老醫卜星相之學靡不
淹貫而尤長於史其於史也尤熟於前明余從先生應
試杭州旅舍無事縱論前代黨禍及奪門議禮諸大案
挺擊妖書諸大獄礦稅流寇諸大變窮日夜不息同寓
諸子摒擋什物爲入閤計而吾兩人談魯監國逸事猶
燒燭繼之鄰舍生竊語曰此何爲者豈將以明史應舉
邪侍者入告始一笑而罷先生少能詩原本宋人與女
弟夫施君蓮伯相唱和益殫其業施君似放翁而先生
則似誠齋古文高簡取法桐城於梨洲謝山之派均爲

轉手平素曠略每有所作不自收拾故雖享高年負重
望而存者無幾身後按諸篋衍僅得數十首編詩古文
各一卷猶未足盡先生之蘊也性孝友本生父儒林府
君歿先生甫九歲與其兄幼竹先生同事寡母能得懼
心旣出嗣事所後母邱太孺人尤極色養進喪哀毀骨
立幾至滅性幼竹先生居故居先生則遷居邱隘相距
十六七里彌月不見輒惘然如有所失旣見低徊依戀
不忍遽別數十年以爲常諸子彬彬守其家法里中言
雍睦者必首推盧氏焉以諸生充貢援例授訓導卒年
八十丁丑之九月十六日也聘同縣俞氏監生夢蘭女

未婚卒娶鎮海陳氏附貢生景范女治家勤儉事姑有
孝行先先生卒子六顯廷監生友燦廩貢生友燮監生
友燿縣學生友炬同治癸酉舉人候選訓導友炳附貢
生顯廷友燦友燿竝前卒女一適同縣李英舜孫六人
光堃縣學生光垕廩生光型光重光埭光墉孫女六人
曾孫二人先生與先贈公稱石交過從頻數余自孩抱
劒耳於先生之側先生亟賞之常曰此子不凡他日必
能以學名世今余年六十矣衰齡暮齒業不加進殊負
先生期許之意深自慚悚然猶幸厯官四邑粗有治狀
爲彼都人士所稱道差足藉手以告者乃不在儒林文

苑中也先生其許我否邪銘曰

不自表襮宜其學之窳也無多撰述慮其名之晦也此
樗菴銘月船翁之辭而先生其繼也祖與孫雖異世也
後與前若符契也吾故述蔣辭以爲先生志也

周葵圃先生墓志銘

葵圃先生之歿也其鄉人曰吾去吾先生吾儕其誰式
也其門弟子曰吾去吾先生吾黨其誰質也其賢士大
夫曰吾去吾先生吾邑其誰爲之望也嗟乎先生一布
衣耳何令人思慕之太息之之至於斯也蓋先生孝于
親友于昆弟睦于鄉黨以莊蒞妻子而以敬處交友之

閒其爲人也外若簡曠而涇渭之別審焉樸而茂恂恂而和雖僕婢未嘗加以辭色而是非利害之際嚴焉邑中貴遊長者以及閭巷庸人小子莫不與先生接人人以先生爲可親也無求于世無徇于俗而世俗之稱先生者無異辭則信乎先生之行之孚也象山藏書以歐太守孔章王員外蒔蘭兩家爲最而先生迭主之每得一種書詳其本末具其首尾覽之周考之審而後易他書焉質明而起漏三下始息窮年矻仞丹黃靡倦故自經史百家以下逮夫稗官小說道藏釋典之部無不寓於目而積於胸也弟子著錄者數百人其高者率以訓

詒考證詩歌古文辭之學有聲於時而先生未嘗著一書以博取當世名也則信乎先生之學之邃也嗚呼此所以令人思慕太息而不置也先生姓周氏名丹忱字懷赤葵圃其號也象山縣人祖良信父銘諸生母翁氏先生餽於學積久爲貢生同治四年三月十二日卒年七十配何氏先卒子三榮璇榮璨榮珮女二嫁歐行訓何開圻孫九孫女五葬政實鄉黃大壘之麓余以今春客象山亦主歐王氏歐王氏之稱先生者以爲自姜大令炳璋後罕其倫比思一見之而以先生病不果先生亦知余之至也而謂其門人曰吾夙聞董君名乃今則

可以見而惜乎病未能也吾不幸死身後之文其挽之
嗚呼余於先生無一日之雅而辱其惓惓如此乎安可
以不銘也銘曰

弗跂以爲高弗哆以爲豪豐其學潔其操而顧困其遭
吾文闡幽維石斯雕亙千百禩聲則姚

中憲大夫歐君墓志銘

咸豐五年六月二十三日國子監生封中憲大夫歐君
卒春秋七十有九其配吳恭人之歿已十年矣哲嗣知
府君奉君與恭人柩合葬於大雷山之麓卜云不吉誌
石闕如同治四年九月十四日改葬於西沙嶺之陽乃

以翰林學士童君華之傳屬余爲銘君諱光地字承天以字行改字瑞軒先世在宋初有參明州軍事者卽家於官遂爲象山縣人曾祖有恩祖元相父起炎母鮑氏歐氏世力田潛德弗耀而以貲豪一鄉逮君之身益隆隆起縮衣節食勤苦自勵而赴義如飢渴內外戚黨倚爲生活者數十家鄉里有告貸者量給之久而不能償則焚其券歲饑輒出粟以振擇其貧尤甚者籍而授之食比穀熟乃止全活無算邑之人稱君長者遠近無異辭焉明之州爲邑者六象以山名縣唐始隸我縣三面錯海俗尙儉嗇安本業異於他邑無金玉之玩紈綺之

習聲色狗馬之好故邑中稱巨家多長守富者然而一尺布一斗粟皆出於藹手胝足之烈則或靳之而或秘之而不忍遽散之嗚呼睦婣任卹之義固非念子孫者之所知也聞君之風可以起已英吉利之亂象山令范先達議修縣城度其費可萬金衆囁嚅無敢任者令與知府君謀而以請於君則慨然出藏鏹獨任其力其後明州屬縣破者五而象山獨完然則君不獨有德於鄉而亦有勞於國矣君以子貴封中憲階配吳同里人卒於道光二十六年九月二十日年七十有三子一孔章議敘知府銜加一級女二諸生沈光國同知銜陳延經

其壻也孫二景宸樂清訓導捐升府同知景岱候補員外郎孫女六曾孫六曾孫女三其銘曰

嗇於奉豪於用儉起家汎濟衆衆翕然稱善人此一塊土宜子孫

中憲大夫道銜候選員外郎蔡君墓志銘

光緒戊寅余赴官江西與蔡君季白執手於上海時則周君復庵將之澎湖蔣君子相將度隴右相與置酒高會訂十稔之期重集黃浦談笑出門欣然無離別色明年君爲余刻明州繫年錄以所作序寄余審定復申舊約又明年而君之訃至矣戊子八月孤子和霽葬君於

林夾輿之麓來乞志幽乃流涕而銘之君諱鴻鑑字萊卿季白其自號也世居鄞縣東鄉逮君父榮祿公以貿遷起家始徙郡城曾祖兆吉祖有信隱德不仕並贈朝議大夫父筠候選府同知

詔旌義行祠表如例以長子鴻儀貫贈階一品母王氏楊氏烏氏贈一品夫人側室顧氏孫氏顧爲君生母亦贈恭人君席先人蔭慷慨好施急人之急千金不吝先世諸善舉規畫未備偕其兄鴻儀斟酌妥密俾示久遠又好書卽所居爲墨海樓儲藏七萬餘卷與天一閣抱經樓相埒兼嗜金石古玩能別真贋兵燹以後江浙巨

家大半中落舊藏書畫多歸於蔡氏又好遊泝江涉湘
泛洞庭浮彭蠡探廬阜九華諸勝屢寓上海建別業於
黃浦之西南雜蒔花木幽深曲折恣人遊賞無不歎羨
又好客琴者弈者歌者能書者能繪事者能篆刻者麇
至其門倚爲東道主知名之士若王君子裳褚君叔雲
萬君劔盟輩咸館於家禮以上賓刻燭分題倡和成集
自君之歿而海濱之吟事遂衰歇矣所著二百八十峰
草堂詩稿餐霞仙館詞草皆有定本子和霽能讀父書
將次第刊行之君以例授員外郎晉道銜階中憲大夫
先緒庚辰六月二十日卒於上海寓園年僅二十有七

配凌氏同縣贈吏部主事紹南女前君五年卒是爲光
緒丙子十二月二十日年二十六贈恭人側室朱氏余
自乙酉歸田頻客黃浦十稔之約亦允蹈之惜周君蔣
君俱以事罷官絕無音問而君之卒且有年矣承和霽
之請作爲此文蓋不勝山陽之痛也銘曰
以君之才而蚤死吾見其進未見止俠骨千秋葬於此
嗚呼幸矣君有子

袁筠谷墓志銘

道光癸卯余應郡試望見稠人中有頎而偉者詢之則
袁君筠谷也其年君與季弟諤齋竝成諸生越六年諤

齋舉拔萃科余偕樓稽山過其寓始與君接盛夏畏焙
偶解衣左臂有剗痕焉稽山語余曰此十載前筠谷侍
父疾剗以和藥者也余悚然異之同治戊辰余歸自京
都與謬齋襄鄞志局追溯舊事忽忽廿年而君之歿已
六稔矣明年十二月十五日葬君於縣西船篷山之麓
謬齋以所撰行略屬余誌墓乃敘而銘之君諱燾字允
博筠谷其別號也遠祖宋刑部尙書天祐從高宗南渡
遂貫於鄞世居城西白檀里號西袁氏及宋之亡進士
鏞死國難事詳舊志曾祖德達國子監生祖光衡貤贈
奉政大夫考行漳國子監生贈奉政大夫妣李氏陳氏

竝贈宜人君少讀書溺苦於學旣長就試守令皆器之
巡道李曉園負精鑒擇書院肄業士數十人月課署中
待以優禮嘗裒君第一榜其文爲試童子者式而君年
二十九始隸學官又十二年食旣稟七試行省皆不售
戊午後遂不復試君稟先人教有志於進取而軀幹龐
碩艱步履號舍迫隘幾不足以容君天偶熱汗蒸蒸下
浹於衣被熱甚且咯血以是友朋交阻之當君之刲臂
也是爲道光己亥君每日五鼓徒行十餘里詣南湖蓬
萊宮禱藥旣裹創不能復往父病卒不起君哀毀過甚
腰帶銳減尺許逮遭陳宜人憂亦如之人稱其孝咸豐

辛酉粵寇陷郡避難霽靄所賊設僞官徧鄉國王戊正月名捕君伯兄烈將汚以師帥授君舊廬劫守舍僕嚴刑以要之撈掠幾死君憤然曰家可毀身可亡名不可辱也趣伯兄挈家走滬瀆而令諤齋至江北岸以術脫其僕費緡錢千計亂定兄弟返故居悲喜交集會有以非理干之者意詫恨鬱鬱不自解疽發於背期年而君卒矣時同治癸亥十二月二十四日君年四十有九娶竺氏黃氏陸氏勵氏俱無出以仲兄子可爚爲後君於樓稽山爲昵交稽山每爲余稱君不置余由是重君約略舊聞以銘君墓知行略之不誣也稽山名世澤同縣

舉人事祖母以孝著先君十年卒爲牽連書之銘曰
甬上袁氏三支鼎分正獻正學文清有文君繫西袁肇
自南宋忠節洗洗兩家伯仲越七百載傳緒及君以義
抗賊以孝事親嬰疾中年而殞厥命論定蓋棺卓然完
行西山卜兆妥君之靈不懈一字視我刻銘

贈朝議大夫吳君墓銘

鄞東之吳望於前朝君其裔也名曰承鼇取音之比靜
殷其字孝弟力田質直好義家無餘財猶能卹鄰鄉里
稱之僉曰善人廣大之孫元功之子母出於徐配則邱
氏邱歿卅載曠焉獨居壽八十一以疾告殂同治戊辰

季秋九月奄忽之期二十四日以孫資銜贈四品階四子一女孝孚克諧女適於陳子例書名家賢家安維鎔及型厥孫五人孫女十三二曾孫女四曾孫男君之歿也戚鄰悲思求而無繼懿德是不自治生壙曰羅家灘千秋永吉孔固且安維君之配爲我從母用作墓銘以誌不朽

孫恭人墓志銘

權廣信知府仁和許君卜以光緒七年十月二十五日葬其恭人於杭州玉泉仁壽山之陽先期述事略來請爲銘略曰恭人孫氏徽州休甯縣人祖球掌福建道監

察御史父承勳國子監生母許氏吾姑也恭人年十八
來歸於許事祖姑梁太夫人克盡婦職余官中書從余
入都京僚俸薄不足以自贍恭人主內政百計籌度無
令缺乏及以知府次江西屢司權稅恭人軫惜物力益
自勤苦布衣蔬食不改其舊丙子權建昌屬邑大水恭
人脫簪珥雇舟濟溺者猶自歎曰惜無多貲不能徧及
我民也建昌人至今頌之庚辰權廣信蒞任數月恭人
操作如故而精力驟衰十月解綬途次遂患病恩恩回
省延醫診治卒不效次年正月十一日歿於寓舍年六
十前以

覃恩封恭人子一德滋兩淮候補鹽大使女二長適廣東候補同知錢塘張宗翰次適刑部主事同縣方濟寬孫三人孫女一人許君之略如此維孫氏爲新安巨族監生君屢試京兆負才不遇雖家境中落而門閥猶盛許君名善長駕部周生先生之孫也纓紱詩書望於吾浙恭人居家稱淑女歸許稱順婦遵守禮教無愧宗範斯難能也至於坤爲吝嗇婦道之常而恭人佐許君乃以勤施於民用贊賢太守慈惠之治其可謂女而有士行者矣法宜銘銘曰

溫溫恭人作配德門卅載命婦依然食貧行勵於身功

及諸民歸安厥居以昌子孫

趙夫人墓志銘

朱君宗濬將葬其母夫人於涇縣洪村都白楊塢之原
先期來言曰濬不幸童年孤露嗣吾母膝下鞠育教誨
無異己出自吾母之歿至今二十餘年一棺淺土未獲
安壤以妥遺魄負罪滋甚先君之葬實祔於祖墓既封
既固不敢以啟今卜吉得地爲吾母別葬焉惟吾子銘
之按事略夫人趙氏涇縣人父良琯候選知州母姚氏
封宜人夫人年二十一歸於同邑國子監生朱君鍾佐
理內政族稱其賢甫五載國子君遽卒奉其姑倪太夫

人含哀忍痛以承色笑家素饒躬自紡績操作不懈久之宗濬生遂立爲嗣旣成童趨使服賈命曰先業也可以忘宗濬善治生家日益起推其所餘周卹姻黨與夫兄弟析產不競多寡族之人愈稱其賢咸豐十年粵寇東竄涇人憚遠行率避山谷夫人曰非策也獨令其子挈家西走卜居於南昌其後羣盜搜山避難者多被掠族之人尤服夫人先見云明年十二月二十日歿於寓舍年七十有七先以道光二十六年

旌表節孝後以同治元年贈恭人晉贈夫人子宗濬三品銜江蘇候補道孫二葆成候選知府焯成附學生孫

女四人曾孫三人曾孫女三人元孫一人余至江西之
明年始交宗濬遣其嗣君焯成受業於門以是稔朱氏
家世且知母夫人之賢不可以無銘也爲之辭曰

黃田邨之朱實祖婺源昔文公之葬父母一在寒泉隄
一在寂厯山大儒家法後嗣宗焉非古而古行吾所安
奠魄其中華表穹然嗚呼斯惟

旌節朱母之阡

董恭人墓志銘

陳君樹珊之歿余爲表其墓越十三年其恭人亦卒哲
嗣衍等復以志幽之文請乃敘而銘之恭人董氏慈谿

人父秉恆國子監生封朝議大夫母徐氏受封如例恭
人年二十歸於鄞之陳氏爲五品銜會稽訓導政鍾繼
室卽樹珊君也祖姑楊宜人姑張淑人竝在堂兼承色
笑咸得其懽心與長姒盛淑人和洽無閒撫前室子厚
於所生子宗黨稱焉張淑人棄養恭人方產女不克親
視含殮哀鬱成病氣逆而喘終其身勿瘳遇忌日顏色
慘沮思所嗜好必手治以進之其摯行如此樹珊君昆
季俱好客衣冠往來歲無虛日諸子羣從繼起尤負文
譽交遊日廣過從日多恭人率子婦主理中饋一飲一
食無不豐潔雖夜分未嘗言倦客趨其門若水之就壑

也余與樹珊君同歲成諸生而與其子壽祚同歲登鄉薦當時賓從恆預其列及倦宦歸田壽祚已前卒風流消歇曠如隔世環顧郡中能繼陳氏而起者蓋寂寂無所聞矣恭人性慈善遇侮甬輩不加以聲色傭者感之有相依數十年不肯去者僕婢某氏家赤貧夫亡將擬改嫁恭人勸之守而爲之償宿逋卒完其節宗黨尤以是稱焉初封孺人晉封宜人後以從子康祺官貤封恭人光緒丙戌九月十一日卒年六十有六子若女具見陳君墓表中不復贅孫益其二爲六人孫女益其三爲十四人曾孫一人葬之地亦具前表銘曰

佛氏之說流入中國雖士大夫亦爲所惑何況婦人庸庸無識頂禮空門施捨山積卓哉恭人生不佞佛屏絕髡徒毋履我闔窺豹一斑觀人一節劉傳杜編列女之列

椿兒埋銘

嗚呼吾忍銘吾兒也乎哉吾以今年九月八日喪我先妣越五日復喪內子諸弟筦家政有事於外所與朝夕侍靈幃者獨吾兒耳今兒筵告撤哀痛稍抒而吾兒又死矣天之厄我何其酷也兒姓董氏名道椿預字之曰南喬鄞縣人也生而慧甚周歲能言四歲教之識字日

可百餘亡何而痢疾作自六月至明年二月始愈遂苦
稟弱目益短視右耳常作楚五歲入家塾以余病輟讀
者半載旋遭寇難避瓶窰避江北皆隨余行亂定而始
返約其就塾閱四年耳而以疾若亂廢者強半其在館
可一稔也然於三百篇大旨已能通解授虞夏書至周
貢余以輿地專門之學教之則取幅紙以筆塗抹如帶
如礪間之則曰此水道也此山形也諦視之則南朔兩
界準望皆合余喜曰孺子可教也今年六月學爲詩以
風雷雲日四題命之有句云亂搖修竹影怒吼老松聲
輪鳴龍盡起幕震燕皆翻晴空披絮帽秋水浣羅衣一

輪離海角萬國仰天心亦可喜也兒天性純孝自斷乳
依祖母邛太安人太安人年高無齒兒每得果餌以柔
脆者進之與余共飯余所嗜者不命之食不食也微及
鹹卵亦食其白而以黃者奉余侍余宿苦次共枕則溫
余被異枕則擁余足謂家人曰爺畏寒母死無爲之薰
烘者吾故以身熱之也嗚呼黃童之溫席膝孝子之分
瓜古人有此一節可以傳矣而吾兒兼之是難能也然
古人往往有以孝感延其齡者而吾兒之死又何其促
也兒面貌溫雅生年月日皆入格談者言其必貴在江
北時宋蓮叔觀察洪筱鄉孝廉旦晚過臨抱兒置膝上

與之屬對皆以大器望之嗚呼孰謂其僅及下殤邪豈
精一之植天固不能與雜糅者竝長邪抑吾之行負神
明而使汝不得終其年也然而酷矣兒以同治二年十
一月二十四日遘微疾歿歿之次夕見夢於吳氏姑言
前身本華普洞侍者而洞主則邱太安人也語涉於怪
故略之二十六日葬兒於東錢湖雷鼓山之麓乃揮淚
書磚以志其大略嗚呼吾忍銘吾兒也乎哉抑爲之詞
曰

吾悲汝質之美而何遽以死乎吾望汝學之成而乃底
於是乎或再生而爲吾子乎或蕩爲飄風墮爲飛塵而

在山之巔水之涘乎嗚呼已矣吾不知哀之所止矣

柄兒埋銘

柄兒生三日而母病兩月而遭亂挾以逃踰月始歸日者言兒當厄不宜養於家鄰有少婦殤子而多乳乃委之壬戌夏兒病痰每嗽面青紫淚簌簌下藥之不愈及秋亂又作盡室北遷以兒之病也姑置焉閏八月三日仲弟抵寓所流涕言曰兒死矣其生才一期耳兒暱於乳母他人抱之則嘔顧見余輒喜躍投余懷中不肯去其天性可知也生不能撫之又不及見其死悲乎旣歸瘞諸原銘之曰

村之南曰昆臺諸殤之骨累累吾忍而捨汝於此耶

正誼堂文集卷十九

正誼堂文集卷二十

鄧董沛孟如

行狀

烏魯木齊都統鏗僧額巴圖魯世襲二等輕車都尉贈太子太保薩爾圖果敏公行狀

曾祖某襲雲騎尉

誥贈光祿大夫振威將軍妣某氏贈一品夫人

祖文祿雲南普洱鎮總兵官襲雲騎尉

誥贈光祿大夫振威將軍妣某氏贈一品夫人

父福隆阿襲雲騎尉

誥贈光祿大夫振威將軍母宗室氏封一品太夫人

本貫滿洲正紅旗人年四十有九

公諱英翰字西林先代從入京以忠節膺世秩公少好讀書才略明敏年十四成諸生甫冠舉道光己酉順天鄉試咸豐四年揀發安徽以知縣用方是時粵寇洪秀全等踞金陵橫擾江南北皖豫之交賊焰蠡起捻首李士林劉元吉孫葵心等羣相屯聚而張樂行起蒙城雉河集勢尤張鳳穎一帶苗沛霖假名團練陰持兩端安慶旣失行省移廬州又移壽州全皖糜爛幾無完土公至皖謁巡撫翁文勤公於行臺屢進策畫文勤深器之

九年署合肥合肥已陷賊紳民各爲團練而頗相仇殺公解之不能得乃擇魁傑之士而陰部署之其後淮軍負盛名將才輩出公有以啟之也敗粵寇陳玉成於華子岡再敗之於小河灣剿雷麻店吳家山黃泥灘五顯廟諸土賊皆平之未幾攝鳳臺旋調霍邱苗沛霖者故鳳臺諸生也乘亂糾眾跨地數百里先後大吏皆羈縻之累戰功奏授川北道加布政使銜而沛霖益驕公知其必變謁大吏極言之且謂速誅則禍小緩誅則禍大吏以時事方亟猶藉其團丁爲枝梧它盜之計不敢決也十一年擢知宿州宿當皖之北境地廣民悍平時

號難治道光中周文忠公刺州用法嚴峻宿人憚之軍
事興文忠駐師於宿莠民不敢動及文忠歿而亂作一
城之外圩寨林立諸大將傳振邦伊興額等屢勦之互
有勝負公奉檄攜一僕徑往貫賊隊直入城中受衆視
事威信大行遂收湖溝澮河諸圩單騎徧造之圩中人
久不見麾蓋卽羣呼曰好官來羅拜受約束公取其豪
以置麾下今宿州城南有英刺史單騎受降碑紀其事
也嘗偵某圩有反志親率數十騎搗其巢執巨魁斬之
餘黨讐服苗沛霖遣黨丁潮臣踞固鎮以阻臨淮大軍
之路公計擒之梟於西關沛霖稍斂跡而張樂行猶熾

傾巢出擾蔓十數州縣

朝命僧忠親王督大軍分路進討屢戰屢捷樂行遁歸老巢同治二年春官軍破雉河集公撫降賊李勤邦劉添祥等爲用密授策擒樂行及其子清義子王宛兒送親王軍前正法傳首三省天下快之於是僧忠親王及漕督袁端敏公交章侈公勞績

天子方南憂淮甸遂駁駁嚮用公矣擢潁州府知府加道銜

賞戴花翎始苗沛霖陷壽州忌蒙城團練綴其老巢不能使遠出也屢驅悍黨攻掠之公方經營宿州未遑西

顧至是東路告定，率舊部練丁出境馳援。而沛霖已先踞丹鳳，集及穆、張、蔡諸圩扼蒙城之路。公嚴隊城西，以次克賊寨，而城南諸圩皆反正。旋署廬鳳潁道，接統蒙亳諸軍屯小澗，集破滄。北宋家圩遂與臨淮大軍接。公所部才二千人，糧仗無轉運，取給於宿。宿民感公深竭蹶以應。公日食粗糲，夜宿單布帳，與最下卒同甘苦。每戰必出陣躬指揮，偶小卻則馳十數騎陷賊陣，時出其背而未嘗有毫髮傷。忠親王按視知之，歎爲奇才。沛霖以大隊逼蒙城，公遣部將黃秉忠率親卒翼城而營，爲蒙城之援。賊黨陳大喜等駭合圍，秉忠與外營隔絕而

公營益單鑿戰無虛日。猶時以騎軍齎糧糗濟城守者。別遣副將程文炳克高爐集斬賊首高加。逾月而總兵陳國瑞之師自山東至。又逾月而將軍富明阿之師自揚州至。又逾月而忠親王大軍乃畢至。遂解蒙城圍。斬沛霖降懷遠。潁上諸賊目撫圩寨之懷反側者。皖北略定。方沛霖之圍蒙城也。繞城爲牆。繞牆爲塹。中聯數十百營。環伺而守。營各有塹。三五重塹。深而牆高。基土陡削。不可以容趾。鑿壁爲坎。匿其中。以避鎗礮。官軍卽逼塹。寂無聲。夜則巡壁上。聯袂呼警。諸將輪攻。不能破。公建議環賊營外復築重垣。以賊之攻城者攻之。垣外掘

地道令軍士蛇行而進破一壘餘壘震潰賊自限於濠塹不得出公督諸軍四面齊入賊瓦解沛霖乘夜竄卒爲我軍守外垣者所獲時二年十一月也其年八月公已擢安徽按察使次年巡撫喬勤恪公奏平苗寇功賞格洪額巴圖魯尋以保舉降人爲忠親王所劾銷勇號部議降調

上心重公

特旨改降五級留任張樂行之誅也其姪總愚糾別賊入豫與粵寇賴汶光捻首任柱合五月圍湖北之麻城東逼英霍忠親王檄公援之由商城會剿道遇賊大小

三十餘戰乃達於石橋灣距麻城八里而軍賊號四十萬阨山險編木爲闔木五重閒以磚一重阻我進路公與陳國瑞相次上陳欲併公軍不可得故後期俾公以孤軍出欲陷公公陽與結懽而招其部將郭寶昌率銳士二百夜踰崖入賊闔火之賊大潰向羅田西走陳軍徘徊欲爲亂寶昌洩於公公急告勤恪密疏其狀而陰解其黨羽軍心以安寶昌遂舉所部從公矣七月粵寇僞輔王陳得才僞端王藍成春自陝援金陵公四出軍拒之一戰於土門河再戰於楊柳灣三戰於黑石渡皆大捷得才窮蹙仰藥死成春及僞左護軍將馬永和相

率詣軍降。公夜張鎧肩輿從三驢直入其營。撫十萬眾歸命。懼呼薙髮。委器械。山積。遂戮成春。以徇。分別散遣者八萬餘人。九月。擢布政使。復

賞鏗僧額巴圖魯。四年春。賊擾河南。

上命公帥師赴援。勤恪以皖防亟。疏留之。賊尋入山東。四月。僧忠親王殞於曹州。賊勢大熾。

朝議以曾文正公爲

欽差大臣。節制三省。賊覬蒙宿舊。巢大舉南犯。公督道員史念祖等屯雉河集。以拒之。黃秉忠駐龍山。集易開俊駐蒙城。相爲犄角。賊十餘萬分踞石弓山。龍王廟。臨

渙集諸險要賴張任三賊首皆會秉忠開俊以軍寡俱退而雉河之營遂孤糧道阻絕援師不敢前勢危殆公屬念祖等堅守而自以二十騎夜突圍至西洋集挾援師俱進於是總兵張得勝首破高爐集挫賊鋒淮軍劉銘傳破石弓山豫軍張曜宋慶破張家園分道並集公晝夜嚴陣直薄賊壘史念祖困圍中已四十五日聞援師至卽同總兵程文炳等開營出賊腹背受敵遂大敗復竄河南公與諸將士執手相慰勞無不泣下其後勤恪奏立渦陽縣於雉河增設龍山營遊擊以重皖防皆公在雉河定策也二年之中賊由陳汝徐沛屢犯皖境

公率諸軍嚴遏之。奏渦河迎仙店諸捷。賊死咋不能入寸尺。五年八月擢安徽巡撫。九月賊首任柱賴汶光自豫竄山東。號東捻。張總愚自豫入秦。號西捻。秦撫新敗。以勤恪代之。勤恪知秦軍不足恃。奏以郭寶昌從征。皖之良也。公念秦事亟。遂遣之。月饒四萬。仍給於皖。郭軍戰關中。戰河北。皆大有聲。厥後提督金運昌接統其軍。從定西域十餘年。中饋皖饒數百萬。皆公首規也。十一月東捻突過沙河。由固始犯皖。皖軍扼之。遂由光山竄麻城。公率張得勝分防六安之流破潼霍山之漫水河。諸處賊尋西走。會文正有疾辭軍事。

朝命肅毅伯李公督師駐徐州六年五月賊復由楚涉豫沒入山東公與李公定計就運河樹壁壘因地圈賊使不能爲流寇先後入告

詔從之公乃督諸將渡淮黃秉鈞統英字軍八營赴宿遷扼上游張得勝統凱字軍九營赴貓兒窩灘扼下游程文炳統強字軍八營居中策應而以騎軍五營往來巡哨並調水師余承先等三營由洪澤湖駛入運河爲陸路聲援興築隄牆晝夜併工膠萊河之防亦同時告竣東捻之勢始蹙十月丁外艱疏聞
賞假百日專理軍務有移孝作忠之

諭時淮軍斬僞魯王任柱餘黨四散圖撲運河皖軍徼之牛師韓降曹禧等千餘人徐登善降高春等方長華降王鳳等各數百人而程文炳追賊沐陽亦降任根柱等百餘人僞遵王賴汶光爲揚州軍所禽僞魏王李允詣提督李世忠乞降世忠馳報公蒞盱眙撫其餘黨而以李允罪大不可赦請

旨斬之東捻平論功

賞三等輕車都尉世職公再疏乞守制已得

旨俞允而西捻張總愚越黃河由晉入豫七年正月犯畿南公以京輔戒嚴義不得顧私遂馳軍入援行至開

封聞駐劄河南之

命公以全軍奏交豫撫李公鶴年調遣三上疏乞守制
詔慰留之尋

諭公統所部渡河會

欽差大臣李公於臨清用前計守北運河自張秋迤至
天津如守南運法皖軍畿軍淮軍楚軍山東軍分地設
汛兼防德州運河西捻亦困六月諸軍大集張總愚數
萬眾就殲於徒駭河之東北路肅清

詔敘平賊功加公太子少保

命安插降人回皖乃奉太夫人致贈公之喪於京師假

滿

命仍攝皖撫。四疏乞終喪不許。服闋遂真。除八年沿江水災。拜疏請振。未及報。先動帑以濟民。賴全活。水既涸。檄州縣吏建築江隄。植蘆柳以護之。併修復東湖水利。清丈廣德建平甯國田。俾主客戶相安。至今無事。叛將宋景詩逃山東。巨寇楊輔清逃福建。密購禽之。悉寘於法。皖南關文貴。皖北李六思。謀爲亂。皆及其未萌。誅之。其它小醜殄滅無孑遺。境內熙熙咸樂休養。加厚士類。設中江書院。延名師課之所。識拔多英俊。省垣風氣頗尙華美。或以告公曰。皖北民椎悍。諸將自兵閒來。尤桀

驚不易馴也。今使覩冠裳之盛。陶之以歌詠。而節之以威儀。彼知。

朝廷爵祿之可榮。斯潛移默化於不自覺矣。非所謂銷禍無形歟。聞者胥服。十三年擢兩廣總督。遵

旨入

覲。光緒元年。

陞辭從海道南行。至廣州。二月。視事。以議收闡姓捐爲將軍巡撫副都統所劾。闡姓捐者。粵東一巨款也。前歲以科道言禁之。而莠民私踵行不能革。公因監司之請。判允之。而遂以是望吏議落職。公回京。閉門奉太夫人。

未嘗有外交

朝廷念公前勞以其年十月

賞還世職旋

賞二品頂戴署烏魯木齊都統二年春西出關七月至
古城接篆遂赴迪化州邊疆新復城野荒寥廚傳不能
給公一安之惟以守備單弱爲慮奏通籌善後一疏及
真除

命下公已病瘡四十餘日強起謝

恩翼日復患痢自知不起力疾草攷疏十二月八日薨
事聞

賞還花翎及巴圖魯名號贈太子太保照軍營病故例
議優卹復以母氏年高

賞白金二千兩人獲六兩予公謚果敏宣付史館立傳
竝準安徽省城潁壽亳宿渦陽蒙城諸郡縣建立專祠
公以先世勲故襲雲騎尉赴粵時

恩命併襲晉二等輕車都尉配蘇完瓜爾佳氏

誥封一品夫人後公十五日歿於京師尙未知公訃也
公無子遺女一幼未行笄曰英壽年甫十三太夫人之
年已七十有三矣公一生仕歷與兵閒相終始以守土
官經畫軍旅盤根錯節勉盡職守而未嘗有乞閒乞假

之贖待僚吏馭將卒開誠布公賞罰必當尤善用降人能盡其力事變猝臨當幾立斷經權互用而不拘拘於常格故能戡大難成大功還全皖之士俾江南北數千里之民重覩天日卽粵東被議一事公明知其非政體然當此需財孔亟之際出下策以聊濟時艱亦勞臣謀國之苦衷可使天下有識者共白其無它而不能不見屈於同官持正之口此則九原之下公之所猶飲憾者也公自以世臣同國休戚雖非其職掌亦力言之如陳畿輔善後疏論日本通商疏條議海防疏皆洞中時弊可見施行粵東解任疏論吏治防務累千百言不以身

之退而遂默也。遺疏中痛論中外大局，感憤溢言，表身殞絕域而心繫

闕廷，斯可謂之盡臣也已。公既無嗣，而一弟尙幼，疆事本末，恐致湮漏。江西巡撫李公文敏公門下士也，屬沛狀其事，乃卽當時奏報條繫年月，參以諸家紀載及故吏之所傳述者，爲文一通，上之史館，以備採擇。且傳示公弟，爲異日祠碑神誥之底本焉。謹狀。

朝議大夫直隸宣化府知府鄭公行狀

曾祖觀洙甯波府學生

贈朝議大夫妣舒氏贈恭人

祖椿鎮海縣學生

誥贈朝議大夫妣陳氏贈恭人

父熙鎮海縣學生候選知府

誥授朝議大夫妣吳氏封恭人

本貫浙江甯波府鎮海縣人年六十有五

公諱賢坊字輿仙一字小淳能齡其自署也鄭氏世居定海之龍山明季始遷縣西郭外

皇朝康熙中改定海曰鎮海遂爲鎮海縣人家世儒業承六葉之傳隸名庠序至公而始大公幼聰穎七歲入塾不煩督課十二應童子試聲噪郡邑會有夷難停試

事者三年道光癸卯並舉歲科成諸生入郡學戊申以
高等食旣稟已酉充優貢咸豐辛亥登鄉薦助修海塘
授內閣中書方是時洪秀全等亂江淮張樂行等亂徐
兗南北交阻輪船入山東洋猶有厲禁計偕之士或中
道而歸或望洋而歎鬱鬱無所試公奉父家居自奮於
學無何甯波陷賊設僞官魚肉鄉里公避地於縣之南
鄉再避於郡之江北妻兄陳中書政鑰以才略爲當道
所重招義旅撫降人密約西夷渠帥尅期恢復公力贊
之明年四月中外軍復甯波盡收屬邑公與有勞焉當
道延公襄善後局郡縣新復公私草創議令諸僞官出

賈金以充軍餼一切勿問公謂諸僞官助賊爲虐必嚴
治之乃中於理其脅從者弗問可也與當道議相左遂
辭局務不赴然如文廟書院校士館以暨文武署廨諸
大興作則皆以身倡之時論翕然未嘗不交稱公也同
治戊辰始成進士

朝考一等改庶吉士公舉鄉試出呂文節沈文定之門
其舉會試復出朱文端王文忠之門諸公皆

中朝碩望諳練掌故文節文忠尤以風節理學著聲當
代公厯侍座側親炙其丰采飫聞其言論益奮於學將
爲師門薪火之寄而不屑屑以辭章鳴余舊客都下嘗

與公縱論及之而知公志趣之遠也辛未散館授翰林院檢討鎮海入

國朝二百餘年未有以翰林留館者有之自公始不數年而曹編修昌燮繼之邑人以爲盛事光緒乙亥大考二等充國史館協修官丁丑充

穆宗實錄協修官己卯正月充纂修官七月充總校官十二月全書成兩邀獎敘兼拜花翎文綺之

賜論者謂

毅皇帝中興寶祚臨御十有三年奉

慈宮之訓肅清羣慝

鴻猷駿烈昭鑠簡編卽以平定粵捻方略論之卷帙繁
重視

仁宗之平教匪幾及一倍

高宗之平金川幾及五倍

聖祖之平朔漠幾及二十倍鋪敘事狀而詳核其月日
審定功罪而明著其是非彼此句稽均費功力而秉筆
諸臣乃能於三四年中迅速蕝事遂使煌煌巨冊垂示
千秋此固非一手一足之烈也而公之賢勞亦可見矣
庚辰六月充功臣館纂修官壬午二月京察一等奉
旨以道府用六月授江南道監察御史莠民黃金滿倡

亂台州鄰郡戒嚴公疏請

諭飭督撫選將勦除金滿遂降十一月署河南道監察御史十二月授宣化府知府明年四月赴任沿途詢問民間疾苦靡不周至接見僚屬諄諄以徵解聽斷緝捕三事爲勗郡中產皮革舊納官署以千百計公甫視事卽檄裁之道路謹頌邊地苦寒陰氣慘栗公年逾六十精力少衰頗以爲慮甲申二月春祭畢陡患骸疾自此艱步履然體貌豐潤飲啖如平素其於公事不廢也宣化山川雄厚風氣剛勁而苦多盜北接牧場爲察哈爾故地時有騎賊闖入邊界公諭剌縣力行保甲俾居民

自相守衛盜風衰熄任公道鎔自浙藩移畿甸命管內
牧令籌備倉穀限期嚴切及擢撫山東奉行者稍怠或
以虛文應之公曰此良法也漢制輸粟塞下以次賜爵
級明初淮南亦令於九邊納米方給鹽引其爲民食計
者深矣安可以任公之去而置之邪親歷所屬敦勸富
戶按畝輸本色儲之官廩百姓爲之語曰公足不負公
惠孔長使我有穀使我有倉皆實蹟也公以詞臣出爲
二千石邊氓質魯獄訟清簡雖臥治之有餘而公敏於
任事不以疴癢自諉如多倫查木稅西甯按教匪一奉
大府之檄無不遄行祈寒酷暑有所弗顧人以是服公

之勤蔚州買空一案州官已定讞市井姦宄圖翻上控
願奉萬金爲公壽公嚴斥之批行州官論治如律人以
是尤服公之正云丙戌四月引疾乞休上官允之遂於
五月由海道南歸公歷任中外幾二十年服御儉樸無
仕宦習氣旣抵家日以胡牀命兩人舁之出入堂寢所
過從者桑梓舊交多老成耆碩之士觴豆言歡豪興如
故然骸疾未減期月之間迭謁數十醫證治無效丁亥
四月招西人治之亦不驗延至七月五日歿於里第諸
子一在閩一在津一在都中先後促歸均得視含殮治
喪如禮公生平事親盡孝母歿父不再娶公偕其弟賢

域傍榻同臥以慰岑寂非奉命不入內寢也席先人餘
蔭乞可小康京邸十餘年蕭然一室未嘗置媵侍戚族
朋好以困乏告者時周卹之無吝色亦無德色歿之日
聞者皆爲流涕前娶王氏同縣人國子監生贈通議大
夫序女贈恭人續娶陳氏鄞縣人候選州同知贈通奉
大夫諤女封恭人子三鴻壽附貢生知府銜福建候補
同知綬祺同治癸酉舉人兵部郎中職方司行走補缺
後以知府用鍾祥光緒乙亥舉人分發江蘇知縣女二
長適府學廩生候選訓導同縣胡元欽次適府學生同
縣方駿萃俱陳恭人出孫五人志遠志選志通志通志

道孫女九人已行者一人已字者五人余家與陳氏有連公壻於陳故與公亦敘姻誼然識公之始則在杭州四十年來書問往還殆無虛月及公養病旋里赴郡者再且無日不相見也酒酣耳熱輒述往事以佐諧笑故知公之詳未有如余者鴻壽等請余爲狀將以乞通人之傳表并備異日修郡縣志者採擇焉故不辭而爲之謹狀

請旌表先孝子公事狀

五世祖太學公姓董氏諱明倫字彰五甯波府鄞縣人也曾祖士芳字穎臺祖學成字瑞峯父文斗字景星母

殷氏陳氏公生有至性方七歲爲康熙之二十二年甯
郡大疫公父亦染病朝夕侍奉不敢少懈每向晨望北
祈禱稽顙累百父疾爲瘳而公額肉墳起如贅瘤然識
者咸歎其純孝三十七年殷太孺人卒停棺外舍比鄰
失火風勢猛甚已延及於東壁家人操繩杖而救者相
望不敢進公自外人急以身翼柩柩重不能舉公撫棺
狂號血淚交下融風陡回火亦熄若有陰相之者逮事
後母陳太孺人備極色養景星公起家節儉未嘗有珍
羞之享公稟承庭訓自奉樸素而寢門視膳則必供酒
肉中帟廁踰身自浣滌不以煩婢使也如是者幾三十

年景星公年登大耋以康熙五十四年卒公哀毀幾至
滅性營齋營奠竭其力之所入春秋將享懸畫像而拜
之流涕被面常如袒括時也及陳太孺人歿喪之如所
生人以爲難始景星公篤好儒業命公筦家政而令其
次子明保執經鄉塾公兄弟甚友愛數十年無閒言每
有旨蓄第未嘗不獨嘗也服飾華貴之物第未御不獨
御也其後明保以勸學死弟婦張孺人絕粒以殉蓋家
教之所致矣雍正十三年宗師具公行事請旌於學使
帥公念祖帥公手書孝友傳家四字榜於堂越明年而
公卒停尸中堂踰日忽張目醒召其諸子曰吾有一事

未囑是以急返子孫稍有資稟不可不使讀書此汝祖之教也言訖復暝是爲乾隆元年三月一日生以康熙十六年正月五日春秋六十公以援例得入太學配張氏側室王氏子二啟宇啟宸女三竊嘗謂公生平純心篤行事事合宜其童年知孝如唐段秀實躬親賤役如石建孺慕過禮如司馬鬲事亡若存如岑之敬如徐孝肅至於火逼親棺守死勿去則如漢之古初蔡順晉之何琦南北朝之賈恩傅玟徐普濟李孝子宋之何執中元之余丙祝公榮郭通陳汝楫明之楊敬祝大昌唐汝始鄧翰陳倫俱以此彪炳乎百世先太學公以一身兼

之有出於家門庸行之外者隨舉一節皆應史法則皆應旌典而百餘年來綽楔之榮未被是子孫之責也敢以狀質之局中諸公如使援例請旌恩及泉壤慰孝慈百世之惓惓感且不朽謹狀

正誼堂文集卷二十